

Broj: 2201-001-01/17

Banja Luka, dana 22.01.2017. god.

Na osnovu člana 28. stav 1., tačka 17, i člana 48. i 49. Statuta Plivačkog saveza Bosne i Hercegovine, Upravni odbor Plivačkog saveza Bosne i Hercegovine ( u daljem tekstu: UO PS BiH), na sjednici održanoj 22.01.2017., d o n o s i

**P R A V I L N I K  
O DISCIPLINSKOJ I MATERIJALNOJ ODGOVORNOSTI  
ČLANOVA PLIVAČKOG SAVEZA BOSNE I HERCEGOVINE  
OSNOVNE ODREDBE**

**Član 1.**

Pravilnikom o disciplinskoj i materijalnoj odgovornosti članova PS BiH ( u daljem tekstu: Pravilnik) utvrđuje se disciplinska i materijalna odgovornost (u daljem tekstu: odgovornost) članova Plivačkog saveza Bosne i Hercegovine ( u daljem tekstu: PS BiH) koji vršenjem svoje sportske djelatnosti i aktivnosti prekrše odredbe Statuta PS BiH, ovog Pravilnika, ili drugog internog akta PS BiH, odnosno, na bilo koji drugi način naruše ugled plivačkog sporta i PS BiH u BiH ili inostranstvu.

Ovim Pravilnikom utvrđuju se i disciplinski organi PS BiH, način i postupak utvrđivanja odgovornosti članova, vrste disciplinskih prekršaja i disciplinskih kazni, postupak za izvršenje disciplinskih kazni, način vođenja evidencije o izrečenim disciplinskim kaznama, žalbeni postupak, rokovi, zastara vođenja disciplinskog postupka i izvršenja disciplinskih mjera, način i postupak utvrđivanja materijalne odgovornosti, način nadoknade utvrđene materijalne štete, kao i druga pitanja vezana za odgovornost članova PS BiH.

**Član 2.**

Ovaj Pravilnik primjenjuje se na sve članove PS BiH: udružene članice, klubove, plivače/ice, plivačke trenere, plivačke sudije i ostale plivačke radnike.

Pravilnik se primjenjuje i na sva službena lica u PS BiH-članove organa i tijela, Plivačkom savezu Federacije Bosne i Hercegovine (u daljem tekstu: PS F BiH), Plivačkom savezu Republike Srpske (u daljem tekstu: PS RS), članove reprezentacije BiH, te članove svih drugih organa i tijela PS BiH.

Članovi PS BiH mogu birati svoja disciplinska tijela i organe, ali njihovi Pravilnici o disciplinskoj i materijalnoj odgovornosti moraju biti u skladu sa ovim Pravilnikom. U slučaju bilo kakvog neslaganja odredbi ovog Pravilnika sa odredbama pravilnika članova PS BiH, odredbe ovog Pravilnika imaju najjaču snagu.

**Član 3.**

Odgovornost članova PS BiH može se utvrditi samo za prekršaje koji su u vrijeme njihovog izvršenja bili kao disciplinski prekršaj utvrđeni ovim Pravilnikom

Niko ne može biti smatran učinioцем prekršaja prije nego što se to ustanovi pravosnažnom odlukom mjerodavnog disciplinskog organa PS BiH.

Član PS BiH koji svojom krivicom ne ispunjava obaveze ili se ne pridržava pravila, odluka i propisanih mjera od strane PS BiH, čini disciplinski prekršaj u smislu ovog Pravilnika.



Članovi vrše prekršaj i ako je učinjen postupcima ili propustima organa ili tijela, odgovornog lica ili lica koje je bilo ovlašteno istupiti u ime tijela ili organa tog člana.

Odgovornost odgovornog lica postoji ako je prekršaj počinjen njegovim postupcima ili propustima. Odgovornost odgovornog lica ne prestaje prestankom članstva ili dužnosti u tijelu ili organizaciji.

Plivački klubovi, udružene članice, kao članovi PS BiH, odgovorni su za ponašanje svojih članova.

#### **Član 4.**

Nepoznavanje Statuta PS BiH, ovog Pravilnika, te ostalih opštih akata PS BiH, ne oslobađa odgovornosti učinioa prekršaja.

Za prekršaj odgovara učiniooc prekršaja, ili onaj koji ga je poticao ili mu pomagao pri činjenju prekršaja.

#### **Član 5.**

Svrha ovog Pravilnika je da pomaže pravilnom odgoju članova PS BIH, da osigura pravilnu primjenu propisa PS BiH, te da utiče na počinioca i ostala lica na koja se odnosi ovaj Pravilnik, da ne čine prekršaje.

### **DISCIPLINSKI ORGANI**

#### **Član 6.**

Disciplinski organi PS BiH su:

1. Disciplinska komisija
2. Upravni odbor PS BiH

#### **Član 7.**

Disciplinsku komisiju imenuje i razrješava UO PS BiH.

Mandat Disiciplinske komisije traje onoliko koliko traje mandat UO PS BiH koji ju je imenovao, uz dodatna tri mjeseca po isteku mandata UO PS BiH koji je imenovao Disciplinsku komisiju.

Disciplinsku komisiju čine predsjednik i 2 (dva) člana, ukupno 3 (tri) člana, s tim da predsjednik Disciplinske komisije mora biti član UO PS BiH.

#### **Član 8.**

Disciplinska komisija može punovažno raspravljati i donositi odluke ako je sjednici prisutna većina Disciplinske komisije. O održanoj sjednici vodi se zapisnik. Sjednice se mogu održavati u bilo kojem mjestu u BiH, a ukoliko je u pitanju hitnost postupka, sjednice se mogu održavati i elektronskim putem, mailom i sl. Elektronska prepiska dio je zapisnika o održanoj sjednici.

Disciplinska komisija odlučuje većinom glasova ukupnog broja članova Disciplinske komisije.

U slučaju istog broja glasova važeća je odluka za koju je glasao predsjednik Disciplinske komisije.

#### **Član 9.**

Disciplinska komisija je prvostepeni organ koji po prijemu prijave pokreće disciplinski postupak, utvrđuje odgovornost i odlučuje o disciplinskim kaznama.

Disciplinska komisija neposredno rješava i druge slučajeve koji nisu predviđeni drugim propisima, odnosno kada se ne može utvrditi nadležnost tijela koje bi trebalo da postupi po nekom pitanju, a rješavanje tog pitanja je u interesu plivačkog sporta u BiH.

#### **Član 10.**

UO PS BiH je drugostepeni organ koji odlučuje o žalbama podnesenim na odluke Disciplinske komisije.

Član disciplinske komisije i UO PS BiH koji je učestvovao u donošenju prvostepene odluke može učestvovati u raspravi, ali ne i u donošenju odluke o istom predmetu u drugom stepenu.

Odluke UO PS BiH su konačne.



## DISCIPLINSKI PREKRŠAJI

### Član 11.

Disciplinski postupak je moguće pokrenuti za slijedeće vrste disciplinskih prekršaja:

1. Kršenje odredbi Statuta PS BiH, Statuta PS F BiH, Statuta PS RS i ovog Pravilnika, te odredbi ostalih opštih akata PS BIH, ili udruženih članica.
2. Narušavanje ugleda plivačkog sporta i PS BiH u Bosni i Hercegovini ili inostranstvu, te uopšte narušavanje ugleda Bosne i Hercegovine na međunarodnim takmičenjima.
3. Narušavanje ili ugrožavanje međunacionalnih ili međureligijskih odnosa tokom vršenja aktivnosti u plivačkom sportu Bosne i Hercegovine.
4. Nepoštivanje zastave i himne Bosne i Hercegovine, ili obilježja udruženih članica.
5. Odbijanje potrebne saradnje sa drugim članovima kada je ta saradnja od značaja za odvijanje takmičenja ili je u untermesu plivačkog sporta.
6. Nekorektno i nedostojno ponašanje člana prema ostalim članovima PS BiH, npr. iznošenje nečeg neistinitog ili uvredljivog o drugom članu ili službenom licu PS BiH, nagovaranje takmičara za prelazak u drugi klub, a posebno ako se to čini uz obećanje novčanih i drugih nagrada, ili položajnih i materijalnih koristi.
7. Nesportsko ponašanje članova na takmičenjima (prije, za vrijeme i nakon takmičenja), kao što je psovanje, vrijeđanje ostalih takmičara, plivačkih radnika i gledalaca, prigovaranje odlukama sudija, drugih službenih lica, drski odnos prema službenim osobama na takmičenju, putem direktnog kontakta, ili putem elektronskih pomagala, društvenih mreža, prkošenje odlukama sudija ili rukovodstva takmičenja, izazivanje takmičara svoje ili druge ekipe, službenih lica ili gledalaca riječima ili pokretima, i slično.
8. Pokušaj fizičkog napada ili fizički napad na takmičare, službena lica na takmičenju, predstavnike bazena, plivačke radnike, roditelje članova drugog kluba ili gledaoce.
9. Dolazak članova na takmičenje ili učestvovanje na takmičenju, pod dejstvom alkohola ili drugih opojnih sredstava.
10. Pojavljivanje takmičara na pobjedničkom postolju u neadekvatnoj opremi, ili bez odgovarajuće opreme.
11. Nesportsko ponašanje članova na treninzima, pripremama, putovanjima, sastancima, te u okviru svih ostalih aktivnosti PS BiH, odnosno samih članova PS BiH.
12. Slaba organizacija takmičenja, bez obzira na to da li je došlo do vanrednih događaja na takmičenju ili ne.
13. Neopravdani izostanak sa takmičenja ili samovoljno napuštanje takmičenja od strane člana PS BiH, zvaničnog predstavnika PS BiH.
14. Nastup na takmičenjima na kojima član PS BiH, a u skladu sa propozicijama ili drugim opštim aktom, nema pravo takmičenja.
15. Davanje lažnih i nepotpunih podataka o identitetu člana u vezi sa registracijom i sticanjem prava nastupa.
16. Nastupanje i učestvovanje člana na takmičenjima, odnosno vršenje dužnosti za vrijeme suspenzije ili kazne zabrane nastupa i učestvovanja, tj. vršenje funkcije.
17. Neopravdano izostajanje sa priprema reprezentacije BiH, kao i neučestvovanje u nastupima reprezentacije BiH, odnosno nepravovremeno obavještanje o razlozima nemogućnosti nastupa.
18. Nesavjesno, nemarno i nepravovremeno izvršavanje reprezentativnih obaveza.
19. Nastupanje člana na međunarodnim takmičenjima, bez saglasnosti i znanja PS BiH.



20. Neispunjavanje propisanih obaveza člana i ne odgovaranje na zahtjeve viših tijela upravljanja PS BiH za dostavljanjem izvještaja, informacija i drugih podataka u vremenski određenim rokovima.
21. Davanje netačnih podataka i lažno svjedočenje višim tijelima upravljanja PS BiH.
22. Davanje netačnih izjava ili neobjektivnih podataka u javnost (sredstva javnog informisanja), čime se javnost ili drugi članovi PS BiH obmanjuju o stanju, događajima ili ostvarivanju nekih prava vezanih za plivački sport.
23. Pristrasno suđenje ili suđenje protivno pravilima PS BiH i Pravilima FINA-e (tumačenje daje Sudijska komisija PS BiH).
24. Dokazano korištenje nedopuštenih sredstava (doping).
25. Zanemarivanje povjerene dužnosti u PS BiH.
26. Nedolazak ili kašnjenje službenih lica na takmičenju za koja su delegirani.
27. Nepodnošenje izvještaja službenih lica sa takmičenja na koja su delegirani.
28. Podnošenje netačnih izvještaja službenih lica sa takmičenja na koja su delegirani.
29. Ometanje službenih lica u obavljanju njihovih dužnosti na takmičenjima za koja su delegirani, na putovanjima reprezentacije, i slično.
30. Krađe
31. Oštećenje ili uništavanje imovine.
32. Uzrokovanje materijalne štete PS BiH, njenom članu, namjerno ili iz krajnje nepažnje.
33. Neovlašteno korištenje stvari ili sredstava PS BiH, npr. zloupotreba znaka, zastave, pečata i memoranduma PS BiH.
34. Zloupotreba položaja ili prekoračenje ovlasti.
35. Ostvarivanje protivpravne imovinske koristi.
36. Ostvarivanje protivpravne imovinske koristi na račun PS BiH, ili njene članice.
37. Odavanje službene tajne ili drugih tajni koje su utvrđene nekim od opštih akata PS BiH.
38. Ometanje Disciplinske komisije u vođenju disciplinskog postupka izbjegavanjem prijema poziva, nedavanje tražene izjave, nedostavljanje dokaza, ometanjem utvrđivanja istine na različite načine, neuručivanjem poziva svom članu od strane kluba preko kojeg mu je poziv poslan, vršenje pritisaka na istog u cilju donošenja povoljnijeg rješenja u disciplinskom postupku, itd.
39. Neizvršavanje novčanih kazni koje su izrekli disciplinski organi PS BiH.
40. Naplaćanje nadoknade PS BiH, ili drugom članu, za počinjenu materijalnu štetu.
41. Neizvršavanje finansijskih obaveza prema PS BiH, svake vrste.
42. Neizvršavanje finansijskih obaveza prema međunarodnim plivačkim organizacijama
43. Ugrožavanje regularnosti sistema takmičenja u okviru PS BiH.
44. Podnošenje lažne ili neosnovane prijave.
45. Kršenje Pravilnika o registraciji PS BiH, bilo da je učinjeno od člana ili nadležnog registracionog organa
46. Svi drugi prekršaji koji nisu nabrojani, a ugrožavaju ugled pojedinaca ili organizacija i štete pravilnom razvoju plivačkog sporta u cjelini, ili su određeni drugim opštim aktima PS BiH.

## **DISCIPLINSKE KAZNE**

### **Član 12.**

Disciplinske kazne koje se mogu izreći za disciplinske prekršaje iz člana 11. ovog Pravilnika su:

1. Opomena,



2. Novčana kazna,
3. Zabrana nastupanja i učestvovanja na takmičenjima na određeno vrijeme,
4. Trajno isključenje iz članstva PS BiH.

Kazne navedene pod 3. i 4. mogu biti i sa odgodom ( uslovna kazna) u trajanju do 24 mjeseca.

#### **Član 13.**

Opomena se izriče za prekršaje učinjene pod naročito lakim okolnostima, ako Disciplinska komisija ocijeni da će se takvom kaznom postići svrha kažnjavanja.

#### **Član 14.**

Novčana kazna može biti izrečena bilo kojem članu PS BiH.

Novčana kazna ne može biti manja od 50,00 KM (pedeset konvertibilnih maraka), niti veća od 2.000,00 KM (dvijehiljade konvertibilnih maraka).

Visinu konkretne novčane kazne utvrđuje nadležni disciplinski organ, vodeći računa o pravičnosti i težini učinjenog disciplinskog prekršaja, svim olakšavajućim i otežavajućim okolnostima.

Novčane kazne za konkretne prekršaje može propisati UO PS BiH posebnom odlukom.

#### **Član 15.**

Kazna zabrane nastupanja ili učestvovanja na takmičenjima na određeno vrijeme može biti izrečena klubu ili bilo kojem pojedincu koji je aktivan u plivačkom sportu BiH.

Kazna zabrane nastupanja i učestvovanja na takmičenjima na određeno vrijeme ne može biti kraća od jednog mjeseca, niti duža od 24 mjeseca.

#### **Član 16.**

Kazna zabrane vršenja dužnosti na određeno vrijeme može biti izrečena svakom plivačkom radniku ili plivačkom zvaničniku članu PS BIH, odnosno bilo kojem članu PS BiH koji vrši neku od dužnosti u okviru PS BiH.

Kazna zabrane vršenja dužnosti na određeno vrijeme ne može biti kraća od 3 mjeseca, niti duža od 36 mjeseci.

#### **Član 17.**

Kazna trajnog isključenja iz članstva PS BiH izriče se samo za prekršaje učinjene po posebno teškim okolnostima, kad je učinio pri njegovu izvršenju pokazao posebnu odlučnost, upornost i bezobzirnost ili je izazvao posebno teške posljedice.



## **Član 18.**

Pri izricanju kazne, Disciplinska komisija može odgoditi izvršenje izrečene kazne (uslovna kazna) na vrijeme koje ne može biti kraće od 6 mjeseci, niti duže od 24 mjeseca, s tim da se izrečena kazna neće izvršiti ako učinio u tom periodu ne učini novi prekršaj.

Odgoda će se za izrečene kazne odrediti ako prema okolnostima pod kojima je prekršaj učinjen i prema ponašanju učinioca nakon njegova izvršenja, kao i obzirom na njegovo prijašnje ponašanje, Disciplinska komisija ocijeni da učinio i bez izvršenja izrečene kazne ubuduće neće činiti prekršaj, kao i da će samo izricanje kazne s odgodom postići svrhu kažnjavanja.

## **Član 19.**

Pravosnažne odluke o disciplinskim kaznama se unose u evidenciju kazni koju vodi Kancelarija PS BiH, i iste se objavljuju na službenoj web stranici PS BiH.

## **ODMJERAVANJE KAZNI**

### **Član 20.**

Kod odmjeravanja disciplinskih kazni moraju se uzeti u obzir sve olakšavajuće i otežavajuće okolnosti koje direktno utiču na to da izrečena kazna bude niža ili viša.

Naročito se moraju uzeti u obzir težina počinjenog prekršaja i njegove posljedice, stepen odgovornosti učinioca, razlozi i okolnosti pod kojima je prekršaj počinjen, te moralne osobine i ponašanje učinioca nakon počinjenog prekršaja.

### **Član 21.**

Kao olakšavajuće okolnosti učiniocu disciplinskog prekršaja mogu se smatrati:

1. Priznanje krivice za počinjeni disciplinski prekršaj,
2. Ako je prekršaj počinjen kao posljedica reakcije na provociranje i izazivanje,
3. Predhodno nekažnjavanje,
4. Predhodno primjerno sportsko ponašanje,
5. Nastupanje ili učestvovanje na reprezentativnim takmičenjima,
6. Zasluge i priznanja za razvoj plivačkog sporta,
7. Ostale okolnosti koje idu u korist učinioca.

### **Član 22.**

Kao otežavajuće okolnosti učiniocu disciplinskog prekršaja mogu se smatrati:

1. Prethodno kažnjavanje,
2. Ponavljanje istog prekršaja,
3. Kad su nastupile posebno teške posljedice ili ostale okolnosti zbog kojih je prekršaj dobio teži oblik,
4. Ako je prekršaj napravljen organizovano ( učestvovanje više lica),
5. Ako je prekršaj počinjen radi koristoljublja,
6. Ako je prekršaj napravljen za vrijeme nastupanja ili učestvovanja na reprezentativnim takmičenjima,
7. Ako je prekršaj napravljen za vrijeme nastupanja ili učestvovanja na državnim prvenstvima ili međunarodnim takmičenjima,
8. Ostale okolnosti koje ne idu u korist učinioca.





### **Član 23.**

Ako se odmjerava disciplinska kazna za više prekršaja o kojima se odlučuje istovremeno, najprije se određuje kazna za svaki prekršaj posebno, a potom se odlučuje o jedinstvenoj kazni, i to na slijedeći način:

1. Ako je za jedan od prekršaja određena kazna trajnog isključenja iz članstva PS BiH, onda se izriče samo ta kazna,
2. Ako je određeno više vremenskih kazni zabrane nastupanja i učestvovanja na takmičenjima, odnosno više vremenskih kazni zabrane vršenja dužnosti, kazne se spajaju u jednu jedinstvenu vremensku kaznu čije vrijeme trajanja mora biti manje od ukupnog zbira određenih kazni, a više od polovine ukupnog zbira određenih kazni,
3. Ako je određeno više novčanih kazni, kazne se spajaju u jednu jedinstvenu novčanu kaznu čija je ukupna visina jednaka zbiru pojedinačno određenih kazni, s time da ukupan iznos ne može biti veći od 2.000,00 KM (dvijehiljade konvertibilnih maraka).

### **Član 24.**

Ako prekršilac počini prekršaj za vrijeme dok već izdržava kaznu za ranije učinjeni prekršaj, izreči će mu se jedinstvena kazna za sve prekršaje, uzimajući prije izrečenu kaznu kao već određenu.

Kazna ili dio kazne koju je počinilac već izdržao uračunaće se kod izricanja jedinstvene kazne.

## **DISCIPLINSKI POSTUPAK**

### **1. Pokretanje disciplinskog postupka**

#### **Član 25.**

Disciplinski postupak pokreće se na osnovu prijave Disciplinskoj komisiji od strane bilo kojeg člana PS BiH, člana rukovodstva plivačke organizacije i sl, koji uoče prekršaj.

Prijavom se istovremeno ili posebno može pokrenuti i postupak za utvrđivanje materijalne odgovornosti nekog od članova PS BiH.

#### **Član 26.**

Prijava se podnosi pismeno, putem Kancelarije PS BiH ( pisana prijava šalje se preporučenom poštom na adresu PS BiH, sa naznakom: „ Za Disciplinsku komisiju“).

Disciplinska komisija dužna je odmah informisati UO PS BiH da je podnesena prijava.

#### **Član 27.**

Prijava za pokretanje disciplinskog postupka sadrži:

1. Naziv tijela kojem se prijava upućuje,
2. Ime i prezime pojedinca, odnosno naziv člana PS BiH protiv kojeg se prijava podnosi, te ostali osnovni podaci o istom,
3. Datum, vrijeme, mjesto, način izvršenja i opis disciplinskog prekršaja koji je počinjen, odnosno materijalne štete koja je počinjena,
4. Dokaze (materijalne ili prikupljene izjave očevidaca disciplinskog prekršaja),
5. Ime i prezime, adresu i telefonski broj podnosioca prijave,
6. Datum podnošenja prijave,
7. Potpis podnosioca prijave (anonimne prijave se ne uzimaju u razmatranje).



## **2. Tok disciplinskog postupka**

### **Član 28.**

Kopija zaprimljene prijave za pokretanje disciplinskog postupka, zajedno sa pisanom odlukom o pokretanju disciplinskog postupka, Disciplinska komisija odmah po prijemu prijave dostavlja članu PS BiH na kojeg se prijava odnosi, sa zahtijevom za pismeno izjašnjavanje o navodima u istoj, što će se smatrati saslušanjem.

Vremenski rok za dostavu pisane izjave od strane člana PS BiH protiv kojeg je pokrenut disciplinski postupak je 8 dana, od dana prijema odluke o pokretanju disciplinskog postupka.

### **Član 29.**

Disciplinska komisija može po potrebi zatražiti od člana PS BiH koji je podnio prijavu za pokretanje disciplinskog postupka da je pismenim putem dopuni, a također može zatražiti i dodatne pisane izjave od ostalih očevidaca disciplinskog prekršaja za koje se smatra da mogu pomoći u rješavanju pokrenutog disciplinskog postupka.

### **Član 30.**

Sve pisane odluke, te ostala pisana dokumentacija, od strane disciplinskih organa PS BiH dostavljaju se:

1. Pojedinacima koji su članovi PS BiH, preko plivačkih klubova čiju su članovi ili direktno na njihovu adresu prebivališta,
2. Ostalim članovima PS BiH, direktno na njihovu adresu prebivališta.

Datum kada je pisani dokument dostavljen klubu smatra se kao datum uručjenja istog, te se pojedinac kojem je na ovaj način dostavljen pisani dokument ne može pozivati na to da mu klub nije u roku dostavio isti.

Sve pisane izjave, te ostali dokazi i pisana dokumentacija, od strane članova PS BiH dostavljaju se Disciplinskoj komisiji putem Kancelarije PS BiH ( pisana dokumenta šalju se preporučenom poštom na adresu Kancelarije PS BiH, uz napomenu: „Za Disciplinsku komisiju“).

### **Član 31.**

Po završetku prikupljanja potrebne dokumentacije i dokaza provodi se rasprava, odnosno konsultacije članova Disciplinske komisije.

Tok rasprave, odnosno konsultacija članova disciplinskih organa PS BiH su tajna, kojih se isti moraju pridržavati.

Nakon zaključenja rasprave članovi Disciplinske komisije se izjašnjavaju o krivici, te o vrsti, odnosno, o roku trajanja određene disciplinske kazne.

### **Član 32.**

Po pravilu, Disciplinska komisija PS BiH donosi svoje odluke o izricanju kazni ili odbacivanju prijave, na osnovu disciplinske prijave, dostavljenih dokaza i dostavljene pismene izjave od strane okrivljenog za počinjeni prekršaj.

### **Član 33.**

Ukoliko tokom postupka Disciplinska komisija utvrdi da ne postoji disciplinski prekršaj, postupak se obustavlja.

Ukoliko se tokom postupka utvrdi da je disciplinska prijava zlonamjerna ili lažna, Disciplinska komisija će pokrenuti disciplinski postupak protiv podnosioca prijave.

Ponašanje člana PS BiH u skladu sa predhodnim stavom ovog člana smatrat će se težim oblikom disciplinskog prekršaja.

### **Član 34.**

Disciplinska komisija može nakon završenog postupka donijeti slijedeće odluke:

1. Odbaciti prijavu i osloboditi odgovornosti člana PS BiH kojem se stavlja na teret određeni disciplinski prekršaj,





2. Izreći jednu od kazni predviđenih članom 12. ovog Pravilnika,
3. Odgoditi donošenje odluke radi pribavljanja novih dokaza.

Odgoda donošenja odluke ne može trajati duže od 15 dana od dana donošenja odluke o odgodi.

#### **Član 35.**

Prilikom odlučivanja Disciplinska komisija nije vezana kvalifikacijom disciplinskog prekršaja iz prijave o pokretanju disciplinskog postupka.

#### **Član 36.**

Disciplinska komisija mora izraditi pisanu odluku o odgovornosti okrivljenog. Pisana odluka Disciplinske komisije sadrži:

1. Naziv disciplinskog organa, datum i mjesto donošenja odluke,
2. Ime, prezime i dužnost lica, odnosno naziv člana PS BiH kojem se kazna izriče,
3. Opis disciplinskog prekršaja,
4. Odluku o kazni,
5. Obrazloženje odluke,
6. Pouku o pravnom lijeku.

#### **Član 37.**

Odluka o kazni dostavlja se okrivljenom-članu PS BiH, a ako je riječ o pojedincu, onda i članu PS BiH ( npr. plivačkom klubu, Sudijskoj komisiji, Stručnom odboru i sl.) čiji je okrivljeni član, zatim Kancelariji PS BiH koja je istu dužna proslijediti pema UO PS BiH, te podnosiocu disciplinske prijave.

Odluka o okončanju disciplinskog postupka, u bilo kojem stepenu, mora se poslati što prije, a najkasnije u roku od 3 dana od dana donošenja odluke.

#### **Član 38.**

Odluka o okončanju disciplinskog postupka u kojoj je izrečena vremenska kazna zabrane nastupanja i učestvovanja na takmičenjima ili vremenska kazna zabrane vršenja dužnosti mora biti dostavljena prekršiocu najkasnije 8 dana prije nego izvršenje vremenske kazne počne teći.

Ako Disciplinska komisija ne odluči drugačije i to ne navede u odluci, izvršenje vremenske kazne počinje teći 8 dana nakon dostavljanja odluke.

### **3. Žalbeni postupak**

#### **Član 39.**

Protiv odluke Disciplinske komisije donijete u prvostepenom postupku može se podnijeti žalba Upravnom odboru PS BiH, kao drugostepenom disciplinskom organu, u roku od 8 dana, od dana prijema pismene odluke.

Žaliti se može podnosilac prijave, okrivljeni, te član PS BiH ( npr. plivački klub, Sudijska komisija, Stručni odbor, i sl), u ime svog člana.

Žalba zadržava izvršenje odluke.

#### **Član 40.**

Ako je žalbu podnio samo okrivljeni protiv kojeg se i vodio postupak, drugostepeni organ mu ne može izreći težu kaznu od one koja mu je izrečena u prvostepenom postupku.

#### **Član 41.**

Žalba se podnosi preko Kancelarije PS BiH i dostavlja Disciplinskoj komisiji (prvostepenom organu) da kompletira svu prikupljenu dokumentaciju i eventualno sama izmijeni svoju odluku ukoliko procijeni da su razlozi za žalbu opravdani.



Po kompletiranju dokumentacije, a najkasnije u roku od 8 dana od dana prijema žalbe, Disciplinska komisija je dužna sve spise predmeta dostaviti UO PS BiH, kao drugostepenom organu, na odlučivanje.

#### **Član 42.**

UO PS BiH žalbu može:

1. Odbaciti,
2. Odbiti, a odluku Disciplinske komisije potvrditi,
3. Usvojiti, a predmet vratiti Disciplinskoj komisiji na ponovno razmatranje i odlučivanje,
4. Odluku preinačiti.

UO PS BiH će odbaciti žalbu zbog njene nepravovremenosti i nedopuštenosti.

#### **Član 43.**

Postupak pred drugostepenim organom, UO PS BiH, mora biti završen najkasnije u roku od 30 dana od dana prijema žalbe u Kancelariju PS BiH.

#### **Član 44.**

Odluke UO PS BiH, kao drugostepenog disciplinskog organa PS BiH, su konačne i na njih okrivljeni nema pravo žalbe.

### **4. Trajanje disciplinskog postupka**

#### **Član 45.**

Disciplinski postupak pred disciplinskim organima PS BiH mora biti okončan u roku od 3 mjeseca od dana početka disciplinskog postupka pred prvostepenim organom, odnosno od dana prijema disciplinske prijave u Kancelariji PS BiH.

### **5. Zahtjev za zaštitu zakonitosti**

#### **Član 46.**

Ako je izrečena mjera trajnog isključenja iz članstva PS BiH i ako je takva odluka potvrđena u drugostepenom postupku, protiv takve se odluke može, od Skupštine PS BiH, zatražiti pokretanje postupka za zaštitu zakonitosti, u roku od 15 dana od dana prijema odluke drugostepenog organa.

Zahtjev za pokretanje postupka za zaštitu zakonitosti može se podnijeti i u slučaju da su disciplinski organi PS BiH prilikom vođenja disciplinskog postupka i donošenja disciplinskih mjera postupila protivno odredbama ovog Pravilnika.

Zahtjev se može podnijeti u roku od 15 dana od dana prijema odluke drugostepenog disciplinskog organa.

#### **Član 47.**

Skupština PS BiH može zahtjev za zaštitu zakonitosti odbiti ili usvojiti.

Ako se zahtjev usvoji, pravosnažna odluka se ukida, a predmet se vraća drugostepenom organu na ponovno razmatranje i odlučivanje.

### **6. Suspenzija**

#### **Član 48.**

Suspenzija može biti:

1. Automatska,
2. Na osnovu odluke Disciplinske komisije.

#### **Član 49.**

Automatska suspenzija nastupa u slučaju kada je član PS BiH isključen sa takmičenja, odnosno u slučajevima koji su posebno naznačeni u ovom Pravilniku ili drugim opštim aktima PS BiH.



U slučaju automatske suspenzije Disciplinska komisija nije dužna donositi posebnu odluku o početku iste.

Automatska suspenzija traje sve dok Disciplinska komisija ne donese odluku o odgovarajućoj disciplinskoj kazni, a najduže 2 mjeseca.

#### **Član 50.**

Vrhovni sudija na takmičenju samostalno, ili na inicijativu delegata, ima ovlasti da isključi sa takmičenja člana PS BiH koji je tokom takmičenja napravio teži disciplinski prekršaj.

Nakon izricanja automatske suspenzije delegat takmičenja je dužan, u roku od 8 dana, dostaviti Disciplinskoj komisiji PS BiH, prijavu za pokretanje disciplinskog postupka protiv učinioca.

Predsjednik SO, vođa puta ili glavni trener reprezentacije, ako obavlja dužnost i vođe puta, ima ovlasti da suspenduje takmičare ili trenere koji se neopravdano neodazovu pozivu na pripreme ili nastupe za državnu reprezentaciju, ili koji su tokom priprema ili nastupa za državnu reprezentaciju napravili teži disciplinski prekršaj.

Nakon izricanja automatske suspenzije u ovim slučajevima, predsjednik SO, vođa puta, ili glavni trener, ako obavlja dužnost i vođe puta, dužan je u roku od 8 dana, dostaviti Disciplinskoj komisiji PS BiH prijavu za pokretanje disciplinskog postupka protiv učinioca.

#### **Član 51.**

Poseban oblik automatske suspenzije može izreći UO PS BiH i to prema svim onim članovima PS BiH (npr. plivačkim klubovima), koji ne ispunjavaju svoje finansijske i druge obaveze prema PS BiH.

Takva suspenzija traje sve do potpunog ispunjavanja svih finansijskih i drugih obaveza prema PS BiH.

Nakon izricanja automatske suspenzije UO PS BiH dužan je, u roku od 8 dana, dostaviti Disciplinskoj komisiji prijavu za pokretanje disciplinskog postupka protiv učinioca.

#### **Član 52.**

Član PS BiH može biti privremeno suspendovan i odlukom Disciplinske komisije i to najduže do okončanja disciplinskog postupka, a ne duže od 2 mjeseca.

Odluku o suspenziji Disciplinska komisija dostavlja članu PS BiH u roku od 8 dana od dana prijema disciplinske prijave.

#### **Član 53.**

Za vrijeme trajanja suspenzije član PS BiH ne smije nastupati i učestvovati na takmičenjima, niti obavljati bilo kakve dužnosti u okviru nadležnosti PS BiH, ili njenih članica, a ako je takmičar, ne može da prelazi iz kluba u klub, niti se može izvršiti preregistracija.

#### **Član 54.**

Ukoliko po okončanju disciplinskog postupka počiniocu bude izrečena vremenska kazna zabrane nastupanja i učestvovanja na takmičenjima, odnosno vremenska kazna zabrane vršenja dužnosti, vrijeme provedeno pod suspenzijom se računa u kaznu.

#### **Član 55.**

Predmeti u kojima je izrečena suspenzija su hitnog karaktera i moraju se rješavati u najkraćem mogućem roku.

### **MATERIJALNA ODGOVORNOST**

#### **Član 56.**

Članovi PS BiH odgovorni su za materijalnu štetu koju naprave svojim disciplinskim prekršajem i dužni su štetu nadoknaditi PS BiH.

Ako štetu napravi više članova PS BiH, svaki od njih je odgovoran za dio štete koju je napravio.

Ako nije moguće utvrditi pojedinačnu odgovornost za štetu, šteta se nadoknađuje u jednakim dijelovima.

#### **Član 57.**

O materijalnoj šteti odlučuje disciplinski organ koji vodi disciplinski postupak.



U postupku utvrđuje:

1. Postojanje štete,
2. Okolnosti pod kojim je ona nastala,
3. Visina štete,
4. Ime i prezime, odnosno naziv člana PS BiH, koji je štetu počinio,
5. Visina paušalnog iznosa štete, ako nije moguće utvrditi njen tačan iznos.

Visina štete utvrđuje se na osnovu tržišne vrijednosti nove stvari.

#### **Član 58.**

Sve odredbe ovog Pravilnika koje se odnose na utvrđivanje disciplinske odgovornosti i izricanje disciplinskih kazni, primjenjuju se i kod materijalne odgovornosti.

### **TROŠKOVI POSTUPKA**

#### **Član 59.**

Troškovi disciplinskog postupka koji proizilaze iz djelovanja organa PS BiH su na teret PS BiH.

Troškovi koji u vezi sa provođenjem disciplinskog postupka imaju članovi PS BiH, idu na njihov teret.

Odredbe iz predhodnih stavova ovog člana primjenjuju se bez obzira na to kakav je bio konačan ishod disciplinskog postupka.

### **IZVRŠENJE DISCIPLINSKIH KAZNI**

#### **Član 60.**

Izrečene disciplinske kazne se izvršavaju uručenjem pismene odluke, a nakon što je odluka Disciplinske komisije, odnosno PS BiH, postala konačna.

Ukoliko učinio disciplinskog prekršaja odbije primiti odluku o izrečenoj kazni, dostava se provodi na način da se ista objavi na službenoj internet stranici PS BiH.

#### **Član 61.**

Novčane kazne se izvršavaju na način da se kažnjenom članu PS BiH ostavlja rok od 8 dana od dana uručenja pismene odluke disciplinskog organa da na račun PS BiH uplati izrečeni iznos novčane kazne.

U slučaju da kažnjeni član PS BiH u ostavljenom roku ne izvrši uplatu kazne, ista se izvršava tako što nastupa automatska suspenzija kažnjelog koja traje do izvršenja uplate.

O neizvršenju izrečenih disciplinskih kazni brine Kancelarija PS BiH, koja o istom obavještava Disciplinsku komisiju PS BiH i UO PS BiH.

### **VANREDNO UBLAŽAVANJE DISCIPLINSKE KAZNE**

#### **Član 62.**

Na osnovu molbe kažnjelog, UO PS BiH ili Skupština PS BiH, može kažnjelog osloboditi od daljeg izdržavanja vremenske kazne ili kaznu ublažiti, ako postoje okolnosti koje opravdavaju takvu odluku ili ako postoje dokazi da je odluka disciplinskih organa postigla svoju svrhu.

Pri odlučivanju u smislu predhodnog stava ovog člana uvijek će se tražiti mišljenje disciplinskog organa koji je izrekao kaznu.

Molba za vanredno ublažavanje disciplinske kazne može se podnijeti tek nakon proteka polovice vremena izrečene kazne.

### **ZASTARA U DISCIPLINSKOM POSTUPKU**

#### **Član 63.**

Disciplinski postupak se ne može pokrenuti nakon 3 mjeseca od dana saznanja za učinjeni prekršaj i učinioca, odnosno nakon proteka roka od 6 mjeseci od dana počinjenja prekršaja.



Za finansijske prekršaje važe rokovi zastare u skladu sa važećim zakonima BiH, F BiH i RS.

**PRELAZNE I ZAVRŠNE ODREDBE**

**Član 64.**

Slučajeve koji nisu predviđeni ovim Pravilnikom rješavat će UO PS BiH.

Bliže tumačenje odredbi ovog Pravilnika daje UO PS BiH.

Ovaj Pravilnik, kao i izmjene i dopune ovog Pravilnika donosi UO PS BiH.

**Član 65.**

Pravilnik o disciplinskoj i materijalnoj odgovornosti članova Plivačkog saveza BiH stupa na snagu danom donošenja.



**PREDSJEDNIK PS BiH**

**Goran Todorović**